

**PETOLO' IZESU' ZUHO
 MINI'MI MONAVE
 GIZE-NGIDINE' LUHUVO
 NITE' NABA 2
 Petolo' Izesu' Evenele Zuho
 Naba Tu Luhuvo Nite'
 Gize-ngidingumu' Gomu'
 Gataa' Gamazi**

Mene luhuvo nite' nene aposolo' Petolo' gizine' ve. Ei' monovo'vemu' nene Mataio' ve Maleko' ve Luka' ve Zohane' ve gizani' buku seta've seta'veukisi ido' aposolo' bukuukisi nene gatelesane. Gohi eikumu' nene naba vanu luhuvo nitekumu' gomu' gataa' gamazi gizuningukisi nene gatelesane. Laza gele none' nene Petolo' aza nene luhuvo nite' gizidoti' gamene ha'na minamivo Loma velite bili hilani' ve lo gele none. A'mine luhuvo nite've nene eikisi ido' eikisi maka' minavesi gili ele'vole' ani' ne'mini gili ele'vole' i minave nene gizo ngimine'. Izesu' evenele zuho gehepeve minani' mukikumu' no-line'za alinge' luhuvo nite'veu' nene ti' lo line': Mene naba tu luhuvo nite' nene a'mine alevemu' gize-lingiduve lo line' nenako nemu' a'mine mene luhuvo nite've nesi nene a'mine gomu' gize-ngidive gehepevevo' gize-ngidine' gelave. Ga'ine laminekovo' gililizave lo gala gelo ti' lo line': A'mine luhuvo nite've gizine' monovo inite' linge mamu' lo ga'ine olosa gizuve line'.

Minevo' alevo'ine lamine' minelive lo

O'moso'mo vise' ani' inite' nene ngeme neive lo lo ga'ine ogo ne gamazitunu' api' ogo gazine'. Ido' O'moso'mo ne'mine ine' nemu' nene ingine Izesu'nimu' gili ele'vole' iga' ani' monovo'nido' imine' mili ne'mine monovosi di minilizave. Ado' lisihe' gehepeve minaa' ido' monokumu' ga'ine gili vevesaa' ido' O'mosomu' gili oko'ine lu'nido' gizebo iga' ido' monoku' amuzo mili geni gihi di vi minaa' ido' engi' zuho Izesu' evenele lu'ine ngemaa' ido' evene' ato ato' vai' lu'ine ngemaa' monovo nesi nene di minilizave line'. Ne'mine monovo di minilizani' ne'mo ingine Guvesi vemu' gilani' nene gihile izeleseive. Ido' ne'mine monovolo' e'metilizani' neloti' nene Guvesi ve Izesu' Kilisito' gizebo o neingu' mo'mosi'ine nene minamilivoba asi mo mineleseive.

Ne'mine lo ti' lo line': Heleloni' gamene nene mo avito' oganako nemu' helekuvo a'mine longimuvoni' initekumu' nene ga'ine molalinako mo lo ga'inevo' ogo minelesuve line'.

Asi'vesi ido' evene' linge masi Kilisito'nimu' lingimani' nene mo lamineto' ve lo lo-ngimine'. O'moso'mo lavo Kilisito'nido' atoli'mine inite' soto' ine' nene ingine Kilisitolesi maka' mini mo ningani'. A'mine ne'mine inite' soto' idi'mo ingine polohetelite gizani' initekumu' nene gili ele'vole' i minado' nene gohi gili ele'vole' gehepeve ani'. Mono' Godolou' gizani' gamazi nene evenelite ga'ninguti' gili gizani' nevoba asi O'moso'mi Sikalahuli'mo lu'ningu' gono davo gizani' ve.

Ne neine'za Petolo' ti' lo line': Gozopo' nene soza polohete minani' nenako luhuvo nite've gatilizaveliti vovo'ningu' nesi minilisave line'.

A'mine soza poloheteliti monovo lo soto' ogo ti' lo line': Inginge inite' vai' dalisa gili monovo goloso di mini evene' muki' nene engi' monovo'nido' nge'metilizave li go'ine izi ngele'mize gopo iga' nave. Ne'mine ilizani'za O'moso'mo lihime dani' angelokisi ido' Noa' minine' gameneu' minani' alevesi ido' Sodomi ido' nGomola ebeku' minani' alevesi lihime ngimine' ne'mine ogo a'mine soza polohetesi lihime ngemeleseive. A'mine soza mono' apizi ngimaa' ave nete engi' gamazilo' e'metilizaveliti lu'ningu' nene ti' li hizaa' nave: Inite' mali'mo adido' do aka'ine hize tile-lengedamivo lengi' lutido' gehepeve ha igi mili minilisave. Ne'mine laa' naha angise'ine inite' mali'mo a'nido' damivo lamine' haza minisa'mave. Ado' monovo goloso ato ato' nete engi' a'nido' di gili' gehepeve li nizavo a'mine monovoliti gelekele' ve lili' igi nizave. A'mine monovo goloso nete di goloso i-ngidikevo sime' nalisave line'. Ne'mine lo ti' lo hungo' ngimine': Izesu' evenele zuhouti' evene' a'mine soza polohetelite ngele'mize gopo ilizave nene Kilisito'nimu' olihe gilamani' gameneu' goloso igi minani' nesi ivile' ivosa goloso gehepeve ilizado' minilisave line'.

Neloti' nene ingine evene' ma Guvesi ve mo ngelo tine' molo amoloseive li laa' avemu' nene ehe' igi minilizave lo lo-ngimine'. A'mine ve ingine ti' li lilisave: O'moso'mo Okulumo' misubo do soto' moladoti' nene inite' hamolitesi senisi amani' nenako alingetasi ngeli ma senisi amilisave. Ne'mine lilisani'za Petolo' aza ingine goline izevo' izevo' neivo nosoli'mo misubo muki' hite osu' lingumu' nene ga'ine molani' neive line'. O'moso'mo a'mine gameneu' minine'

misubo do goloso ine' nenako mo lamineto' inite' ma do senisi ine' ve. Ido' alinge' evene' goloso ezemu' gilamave goni' o-ngedo do goloso o-ngedo me misubo oloku' gize osu' liline' gamenelasi inite' mata' do senisi oloseive.

Ne'mine lo imine' molo ti' lo line': O'moso'mo Guvelesi ve aline' gamene do ha'na neine' nene evene' ingine lu'ine di velepe' izi lukuvo nalizangumu' nene gamene ngemelesamukovo' nene do ha'na neive line'. Ne neiha Guvelesi ve mo aloseive. Evene' ingine aloseive li gilamani' gamenelo' ogo heteleleseive. A'mine gamenelo' nene inite' mata' nene oloku' lo osu' lavo gohi minamoloseive line'. Ido' ne'mine oloseiha O'moso'mo okulumo' gosohokisi misubo gosohokisi lemelove lo lo huko-lede neive. A'mingu' nene monovo lisihe' laminekovo' mineleseive line'.

Nemu' nene ingine O'moso'mi velelo' monovo lisihe' lamine' igi mili minilisa amuzo mili minilizave lo Petolo' lo-ngimine'. Inginge Guvelesi ve alingumu' gizebo i nizani' gamenemu' nene ti' li gililizave line': Leli' lukuvo naloningumu' leme neive. Ido' Paulo' aza ei' luhuvo nite've gizingu' nene hamoli'mine gamazi gize neine' ve lo lo ga'ine ine'. Ido' Paulo' gizine' gamaziuti' gamazi linge mali'mi monovo nene soto' lamine' amivo ge'nebe ogovo' gelaa' nounge. Ne'mino neine' nenako evene' malite a'mine gamazi'mi monovo di ato' igi li soto' iga' nave. Ne'mine iga' ave nene O'moso'mo lihime ngemeleseive line'. Ne'mine lo hungo' ngemo a'mine evene' goloso nete ngele'mize gopo ikelizanako nemu' nene gili ngimami asi Kilisitodati' minine' ngemeni

dameni di amuzo mili ei' Guvelesi ve Izesu' Kilisito' monovo'vemu' gilaa' nene di naba ilizave lo ido' Kilisito' aza dizovo' minelive lo O'mosola lo luhuvo nite've nene gize osu' line' ve.

Petolo' Luhuvo Nite' Mene Gizelesa Api' Ogo No'noho' Gamazi Gize-ngidine' Gamazi

¹ Ado' Izesu Kilisito' gonou' ve ido' aposolo've minuve Simeoni' gulive'ne gohi ma Petolo' naza lengi' luhuvo nite' mene nogize-lingiduve. Ado' O'mosotesi ido' do lu' iza' ivesi minive Izesu Kilisito' aza ve lisihe' minidi'mo nene lelikisi lengikisi do milise' ogo do lisihe' o-ledosa hamoli'mine monovo ado' ezemu' gele ele'vole' oga' monovo lamine' nene leli' limine' ne'mino lengikisi lehize-lengedavo di nizave lengi' nene nogize-lingiduve.

² Ido' lingine O'mosomukisi Guvelesi ve Izesu'nimukisi gili lamine' igi gili minaa' ilizadoti' nene O'moso'mi nasahili' monovo nesi ido' hongu lo lamino minaa' monovo nesi nene lengita mine vai' lo'mo vo miniliho.

Gele Ele'vole' Oga' Monovolo' Nene Monovo Lamine' Linge Ma Ne'minesi Nene Imine' Mili Igi Mili Ilizani' Ne'mo Nene Monoli'mi Gihile Gehepeve Di Soto' Ikevo Guvetesi Ve Izesu' Gizebo O Neingu' Vi Hilalizani' Amuzo Nene Vauve Elo Lehize-lengedeleseive Lo Lo-ngimine' Gamazi

³ O'moso'mo leli' nene monoto' e'metovo' mino minevo' alevo' ogo minelonido' do lisihe' o-ledeline' monovo muki' nene lehize-lede neive. Ido' a'mine lehize-lede neine' monovo dalone' nene aza leli' vise lo-ledo do eita ive eikumu' nene laza ningo gele lamine' ogo gele minaa' olonidoti'

nene dalosunako nemu' nene lehize-lede neive. Ido' a'mine vise lo-ledo do eita ive'mo ne'mine o-lidine' nene ei' labana'vesi ido' ei' monovo've lamine' atoli'mine ogo neine' nesi nene di ti' ilizave losa vise lo-ledo do eita ine' ve.

⁴ Ne'mine ogosa aza lo huko-ledekine' gamazi ma nene do gihile noizo monovo lamine' goloso dizo minine' nene lehize-lede neive. Ido' ne'mine ine' nene me misubou' aleveti lu'ine otavosa lanite' gilaa' naani' monovo iga' nadi'mo lu'ine do goloso oga' neine' initekuti' lingine olovo' ilizadoti' nene O'moso'mo ei' emeni dameni ne'mine nene ize' molo lengemavo di minilizangumu' nene ne'mine ine' ve.

⁵ Ido' ne'mine ine' nenako nemu' nene lingine ezemu' gili ele'vole' iga' naani' monovotido' nene imine' mili mo lamine' goloso gehepeve minaa' monovolo' nene monokumu' gatine' gili vevesaa' monovo nesi igi mili minilisa nene amuzo goloso milalo.

⁶ Ido' a'mine gatine gili vevesaa' monovolo' nene okodine lutido' gizebo iga' monovo nesi igi mili minilisa nene amuzo goloso milalo. Ido' a'mine okodine lutido' gizebo iga' monovolo' nene monoku' amuzo mili geni gihi di dizi minaa' monovo nesi igi mili minilisa nene amuzo goloso milalo. Ido' a'mine monoku' amuzo mili geni gihi di dizi minaa' monovolo' nene mono' avazahasivo' igi mili iga' monovo nesi igi mili minilisa nene amuzo goloso milalo.

⁷ Ido' a'mine mono' avazahasivo' igi mili iga' monovolo' nene lengi' zuho Izesu' evenele lutine ngimaa' monovo nesi igi mili minilisa nene amuzo goloso milalo. Ido' a'mine lengi' zuho

Izesu' evenele lutine ngimaa' monovolo' nene evene' ato' ato' vai' lutine ngimaa' monovo nesi igi mili minilisa nene amuzo goloso milalo.

⁸ Ne'mine monovolo' amuzo goloso mili igi mili ilizave noluvoni' nene a'mine ne'mine monovo lengita mine hutile' ogo mineline' ne'mo nene lingine Guvetesi ve Izesu' Kilisito'nimu' ningi gili minaa' naani' nene hazamu' neivo ne'mi gihile lengita izamilivoba asi mo ize lamine' oloseinako nemu' nene noluve.

⁹ Evene' ma ingine meuko luvoni' monovolo' igi mili minamilizave neti lu'ine'mi vele nene mo ngenge ogosa like minaa' neive. Ne'mine ogavosa O'moso'mo gomu' lihime'ine dani' gilite-ngidine' mamu' nene mo ga'ine molani' gele vivo gopo nizave.

¹⁰ Nemu' nene neze zuhokizo, O'moso'mo lengi' do kegese-lengedo vise lo-lengedo do eita ine' nene di ele'vole' gehepeve ilisa lingine amuzo gohi gohi mili'mi dizivo' minilo. Ne'mine ilizave lo noluvoni' nene nanitekumu' ve. Lingine nene ado' meuko luvoni' inite' igi mili minilizani' neve nene mo monokuti' mo keke' ngeli limi ingamilisave.

¹¹ Ee, ne'mine ilizani' neve nene Guvetesi vesi ido' do lu' iza' ivesi minive Izesu' Kilisito' gizebo o-ledo minevo' minevo' ilingu' nene vi hilalizani' amuzo vauve elo lehize-lengedeleseive.

¹² Ne'mine o neine' nenako nemu' nene naza meuko nolo-lingimuvoni' initekumu' nene gohi lo gatine oka' oka' olosa gele nouve. Ee, a'mine initekumu' nene mo gili mini ado' lengita omo neine' gamazi gihilelo' nene mo gi'mizi gili' li nizani'za a'mine initekumu' nene ha mo lo gatine

oka' oka' olosa gele nosa nene noluve.

¹³ Ee, naza gamene li'nibemukovo' me misubou' oko'nesi nouvoni' gamenela mene a'mine meuko luvoni' initekumu' nene gohi lo gatine ogo lutine do ote-lengedeloni' ne'mo nene lisihe' oloseive lo gele nosa ne'mine nouve.

¹⁴ Ne nanitekumu' ve. Guvetesi ve Izesu' Kilisito' aza heleloni' monovomu' lo soto' ogo lo-nimine' malo' nene do gihile izo a'mine me misubou' oko'ne do huloloni' gamene nene mo avito' ogave lo gele nouvoni' nemu' nene noluve.

¹⁵ Naza osu' lokuvo lingine a'mine luvoni' inite' mene gamene gamene omo gatido' gatido' ivo ha gili minaa' ilizangumu' ve loo aka velelengedelesa nene amuzo molalosuve.

O'moso'mi Labana've Izesu' Kilisitoda Soto' Ogavo Vete Gihiledunu' Ningune' Ne'mo Polohetelite Lani' Gamazi Nene Gamazi Gihile Neive lo Gele Nonge. Linginesi A'mine Gamazi Nene Gili Dalizado' O Neive Lo Lo-ngimine' Gamazi

¹⁶ Laza Izesu' Kilisito' amuzo'vemukisi ido' alingumukisi lo-lingimune' nene heluno gamazi ma gili nge li mini lado' nene e'metosa lo-lengemamune. Asi a'mine amuzo've atoli'mine minine' monovo've nene leli' vete gulo ne'mo ningavosa nene lo-lingimune' ma neive.

¹⁷ Ado' labana've naba' nabasi minivelati' gamazi ti' lo ezela limine' gamenela nene laza a'mida mino ningo gele minune' ve: Neni' vo'nelo' gipe'ne hamo me ve nene neive. Eikumu' nene naza lanite' lamine' nogiluve lo meleho O'moso'mo do naba o-do opo'ni line' ve.

18 Ido' a'mine O'moso'mi labana've soto' ine' gololo' nene Izesukisi minunido' a'mine Okulumokuti' limine' gamazi nene leli' gehepeve aposolo' lingesi gilune' ve.

19 Ido' ne'mino gilunidoti' polohetelite lani' gamazilo' gele mu'musi' oga' une' malo' nene gohi nabosa gele mu'musi' gehepeve une' ve. Ne'mine une' nenako linginesi nene a'mine'mine igi polohetelite lani' gamazilo' ma gili dalizani' nene mo lamine' oloseive. A'mine gamazi nene liti'muso ebeku' lamuli'mo labana' ele neine' ne'minosa ne neive. Ne'mino labana' elo neivo go' lolosa go' nuvonuvo neivo sonohi' ganangome' dizaa' neine' ne'mino Izesu' nene gohi soto' ogo lutingu' hize labana' gehepeve eleseive.

20 Ido' lingine polohetelite lani' gamazi gili dalizani' o neine' nenako naza ti' lo lo-lengemelonil gamazi nene inite' naba neize. A'mine gamazimu' nene gili minisavo' polohetelite lani' gamazi nene gili dalisave: * A'mine polohetelite lani' gamazi mono' godolou' neine' muki' nene polohete hamolitesi angise'ine ga'ninguti' gamazi ma li soto' ani' nene nomive.

21 Ee, polohetelite laa' ani' gamazi ne'mine

* **1:20:** Mono' godolou' gamazi'mi monovo li soto' iga' ave linge malite nene a'mine Petolo' gizine' gamazi'mi monovo nene ato' gohi ma ne'mino neive li laa' nave: A'mine polohetelite lani' gamazi mono' godolou' neine' muki' nene evene' hamolitesi ne'mi monovo've angise'ine engi' ga'ningutikovo' li soto' ilizado' minamave. A'mine mono' gilave ne'mine lani' neve nene Petolo' aza O'moso'mi Sikalahuli'mo ngelebizavosa eitatikovo' gilisa a'mine polohetelite lani' gamazi'mi monovo nene li soto' ilizani' o neive lo line' ve li lani' ve.

nene haza eveneliti lutelo' nene e'meto mo keke' soto' osa'mive. Asi evene' O'moso'mi gamazi laa' ani' nene O'moso'mi Sikalahu' ne'mo zatuho' o-ngedavosavo' nene O'moso'mi veleuti' gamazi laa' ani' ve.

2

Soza Polohete Gomu' Minani' Ne'mine Soza Mono' Apizi nGimaa' Ave Alinge' Soto' Ilizaditi Monovo Lo-ngemo A'mine Ve Nene O'moso'mo Do Goloso O-ngedo Lihime nGemelingumu' Petolo' Lo-ngimine' Gamazi

¹ Ne neiha gomu' nene O'moso'mi eveneleliti vovo'ningu' nene soza polohetesi soto' igi minaa' ani' ve. Ne'mine iga' ani' ne'mine igi lengi' vovotingukisi nene soza mono' apizi lingimilizave soto' igi minilisave. Engi' nene monovo'ine di haleki mini lengele'mize goloso ilido' o mineline' soza mono' nene li soto' igisa engi' meni hize-ngidive Guvelesi ve nesi nene mehe'ine imilisave. Ido' ne'mine ilizadoti' nene O'moso'mo upuho' nite' ngiso do goloso o-ngedeleseive.

² Ido' ingine ne'mine mana'mine monovo goloso gopo iga' ilizani' monovo'nido' nene evene' muki' nge'metilisave. Nemu' nene evenelite mono' aka gihile nene divi' ledivi' ilisave.

³ A'mine soza mono' apizi lingimilizave nene inite' gohi gohi dalone lii soza gamazi li-lingimilizadoti' nene lengitati' moni gelelehe' ilisave. O'moso'mo gozopo' aka'mila a'mine ve lihime ngemelesa line' nene hazamu' ma lamive.

A'mine gamazi lokivo neine' nene okise ongamo ha neivo mo do goloso gehepeve o-ngedeleseive.

⁴ O'mosomu' nene ti' lo gele none: Angelo' linge ma lihime dani' nene ise'ine izivoba asi seni nala' ize-ngedosa lihime ngemeloni' gamenemu' gizebo igi liti'musoukovo' minilizave lo galese naba mo homiu' gehepeve ngimisele neive.

⁵ Ido' ma nene ti' lo gele none: Gamene aka'mila minani' alevesi ise'ine izamo evene' goloso misubo vaiku' mini'mi monani' muki' nene nosodunu' molo hite-ngedo ngebele gese' ine' ve. Ne'mine ine'za a'mine gameneu' nene evene' eiti (8) ado' monovo lisihekumu' lo soto soto' oga' ive Noakisi ido' evene' gohi sevenisi nene alete molo do ngu' izine' ve.

⁶ Ido' ma nene ti' lo gele none: Sodomi alevesi nGomola alevesi ido' numuno ebel'ine nesi nene O'moso'mo lihime ngemo do velepe' izo lenehevo' miniliza akalo' ngele'mize molavo ne'mine ani' ve. Ne'mine ine' nene ezemu' gilamave soto' o-ngedeli initeli'mi avazaha ne'mine do soto' ine' ve.

⁷ Ne'mine ogo aza ve lisihe' Loti'ni nene a'mine ve goloso ingine monovo goloso i'mi angumu' nene muluno hukidi'mo lulo zovo' izo mininguti' nene do u' izine' ve.

⁸ Ee, a'mine ve lisihe' engi' vovo'ningu' mino ingine monovo lamine' avutokovo' i'mi i'mi vi nizangumu' nene ningo gele'mo vine' ne'mo eze lulo lisiheku' nene gamene gamene mulumo geni naba bele'mo bele'mo vo minine' ve.

⁹ Ido' O'mosomu' ne'mine lo gele none' nenako nemu' nene laza ti' lo gelelesune: Guvelesi ve aza evene' lisihe' ngemengu' soto' o ngemelinguti'

do ngu' iza'a' monovomu' nene gele mino evene' goloso nene lihime'ine abeleni ogo ngeme'mo vo mino mukito' goni' o-ledeline' gamenemu' gizebo ogo lihime'ine do minaa' monovo nesi nene mo gele neive.

¹⁰ Ido' a'mine lihime ngemelive engikuti' nene oko'ine'mo lanite' giline' monovo goloso gehep-evelo' e'meti mini evene' naba'mi gizebolo' mini gamazi've gili di minaa' monovomu' gosele' iga' ave nene lihime naba ngemeleseive.

A'ne'mine ve ado' a'mine soza mono' laa' ave engi' nene gamazi gilami hokolize' igi engi' lu'nidokovo' iga' ave mini hozila dizi minave nabamu' nesi nene ngehelele izamivo mini engi' nesi nene divi' ledivi' i-ngidaa' nave.

¹¹ Ne'mine iga' naha O'moso'mi angelo' nete a'mine nene ngivile' igi mini evene' naba amuzo'inesi nizani'za ingine neve nene divi' ledivi' i-ngidi Guvelesi vela goni' i-ngidisa'mave.

¹² Ne neiha a'mine ve nene ize gulo ido' nama gaha ga'ine nomivo minani' ado' evenelite ngimiselo ngebelaa' ido' ngebelaa' olonido' soto' igi minaa' naani' ne'mini mini ingine gilamani' initekumu' nene divi' ledivi' igi laa' nave. Nemu' nene ize gulo nama gaha ngebelaa' nounde' ne'mine ogo O'moso'mo a'mine ve nene do goloso gehepeve o-ngedeleseive.

¹³ Ee, evene' di goloso ilizado' nene O'moso'mo golo hizo do goloso o-ngedeleseive. A'mine soza mono' laa' avete gilavo labana' ele minine' gamenelo' noso' nite' naba nii noso ni'mi vi minaakumu' nene lanite' goloso ve li gilaa' nave. Inginge lengikisi maka' noso' nite' ni mini di

gopo'napa i-lingidi gotine iza'a' naangumu' nene ngolize izi mini lengi' muliseu' nene longovoza hililiza nite' goloso lili' ikeve.

14 Ingene vene' ma ningani' nene ma duvo lii gumine dika' dika' igi lihime daa' monovo nene engitati' osu' losa'mivo monoku' amuzo'ine nomive nene lihime monovou' ngimimise' igi di vaa' igi mini mumuzo' oga' monovomu' api'napi' igi save naba di minani' nenako nemu' nene O'moso'mo usi' ize-ngedelido' i nizave.

15 Ingene aka lisihe' nene huli vi gopo igi nimonani' nene Bosole' gipele Balaamu' vine' akalo' nene e'metikeve. Ado' monovo golosoloti' meni dalingumu' umo hilive ma'mi monovolo' e'metikevosa nene noluve.

16 A'mine Balaamu' ne'mo nene monovo lamine' avuto' ingumu' O'moso'mo elemine' ve. A'mine elemine' nene gamazi lamaa' ine' inite' dongi ize ne'mo nene evene' laa' nounde' nolouti' gamazi lo-emo a'mine poloheteli'mo negi inite' olosa inguti' nene do o'ove lo-dine' ve.

17 A'mine soza mono' laa' ave nene noso hinip-iniku' goko' lavo haza galesevo' minaa' neine' ne'minesi ido' hepeli'mo limuso hubu lo do vavo goline izamaa' neine' ne'minesi nene nizani' nenako ne'mo nene monoku' ma hize ele' i-lidisa'mave. Nemu' nene O'moso'mo liti'muso atoli'mine ogo ize minine' ebeku' vi hilalisave lo a'mine liti'muso ebe' nene salani molo-ngede neive.

18 Ne'mine noluvoni' nene nemu' noluve: Ingene gamazi naba gele vine' gihile've nomine' gamazi li evene' ma ladeni igi igi mili minaa' nave engikuti' idise a'mene olovo' nave nene

okode'mo lanite' gelaa' neido' gopo geligeli igi e'meti minaa' monovo nedunu' nene gohi ngimimise' iga' nave.

19 A'mine ve ingine a'mine ngimimise' ani' aleve nene ti' li li-ngimaa' nave: Leli' le'metilizani' nene lingine inite' mali'mosi nene igi mili ilizani' akatine nene hize tile-lengedamivo goboni ve ne'mine ma minamilisave. Ne'mine li li huki-ngidaa' naani'za engi' neve nene lele'mize tolovo oga' inite' monovo goloso ne'mo nene a'nido' davo ne'mi goboni ve mini milikeve. Ido' goboni ve minikeve noluvoni' nene inite' mali'mo zatuho' o-ngidivo a'mine inite' igi mili iga' ilizave neve nene mo a'mine initeli'mi goboni ve lili' i nizani' nenako nemu' nene noluve.

20 Ee, evene' malite Guvetesi ve do lu' iza' ive Izesu' Kilisito'nimu' giladoti' nene me misubou' minine' monovo goloso evene' lute do goloso o-ledaa' neidoti' nene olovo' igisa gohi a'mine monovou' vi hili mutuho ngatuho igi minilizani' nene gomu' goloso igi minilizado' mini milani' ma nene ivile' ivosa alinge' nela nene di goloso gehepeve igi minilizado' mini mili minilisave.

21 Ee, O'moso'mo lo-lidine' gamazi ma li-ngimikevo gilisa a'mine gamazi gili huli mehe'ine ma imado' nene golo hizo lihime atoli'mine ogo ngemelido' o neine' nenako ingine nene a'mine aka lisihekumu' nene ma gilami minadiniko a'mine lihime do dizo ngemeline' votigileloti' nene lemosa lihime ngemelido' minadinako ne'mo nene mo lamine' ngomo ma idine.

22 A'mine ne'mine ve nene mono' godolou' ti' li

gizikani' malo' nene vo milise' ogave:
 Gulo ne'mo muso velo do huline' inite' nene gohi
 vo naa' neive.

Ido' ma nene:

Ize nene nosou' ongo-dekunivo gohi vo gohiku'
 gomo gomo izo onгаа' neive.

3

*Evene' Malite Guvelesi Ve Nene nGelo Alihe
 Li Ha Lilizaha Ei' Gamazi've Do Gihile Izo Mo
 Aloseite. Lingine A'mine Alingumu' Gizebo Igi
 Nizangu' Nene Lengi' Monovotido' Gizebo Leke-
 seve Igi Mini Monovo Lisihe' Laminekovo' Igi Mili
 Minilo Lo Petolo' Lo-ngimine' Gamazi*

¹ Lu'ne lengeme nouvoni' alevkizo, luhuvo
 meve nene gohi naba tuu luhuvo nene nogize-
 lingiduve. A'mine luhuvo sitaku' mene lingine
 lutingu' gatingu' gilaa' naani' nene mo lisihe'
 laminekovo' gililizangumu' nene gamazi ma lu-
 tine do ote-lengedo lo gatine nouve.

² A'mine gamazi nene O'moso'mi polohetelite
 alinge' soto' iline' initekumu' li soto' ani' gamazi
 nesi ido' Guvetesi ve mino do lu' iza' ive
 minive Izesu Kilisito' lo-lidine' gamazi lengi'
 aposolotinete li-lingimani' nesi nene gililizave lo
 lo gatine nouve.

³ Inite' naba nene ado' ti' li gililizangumu'
 noluve: Gamene alinge' nela nene evene' engi'
 lu'nidokovo' e'meti mini monokumu' gize abe-
 lenga laa' ave ma igi ti' li

⁴ lilisave: Aza tine' molo alosuve lo lo huko line'
 ne'mi gihile've ma nene zaa' soto' ive. Ado' mete-
 mote nesi nene gizebo igi mini hilikeni'za inite'

muki' nene ma do atoli'mine amivo Okulumo' misubo gana' soto' idoti' nene hamoli'minevo' ogo mine do novine' nenako ngelo alihe.

⁵ Ne'mine laa' naani'za ado' mene lo-lengemeloni' gamazimu' nene gelalone li ga'ine hizi ngi likeve: Ado' O'moso'mo lavo Okulumo' nene gozopo' aka'mila soto' ivo misubo nesi nene nosouti' soto' ogo noso veleta gala'muda minavo oluso' minine' ve.

⁶ Ido' a'mine noso ne'mo nene a'mine gamenelo' minine' misubo nene molo hito do goloso ine' mamu' nene ga'ine molavo inite' muki' nene ma senisi amave laa' nave.

⁷ Ido' a'mine O'moso'mo lo neine' gamazi ne'mo nene a'mine idise nizasine' Okulumokisi misubosi nene ololi'mi minani ne'mine mini mono' gilamave lihime ngemeline' gamene nabamu' nene gizebo ha nizasive lo neine' ve.

⁸ Lu'ne lengeme nouvoni' alevekizo, inite' hamo' a'mene lo-lengemeloni' gamazi nemu' nene gilami minikelizave: Ado' Guvelesi ve'mo gamenemu' gelaa' neine' nene do ato' ogo gelaa' neive. Aza neve nene gamene li'nibe gamene hamo' ne'minemu' nene gelavo gamene ha'na goloso kilisimasi vanu tauseni (1,000) ne'mine minine' gelaa' neive. Ido' gamene ha'na kilisimasi vanu tauseni ne'minemu' nene gelavo gamene li'nibe gehepeve gamene hamo' ne'mine minine' gelaa' neive.

⁹ Evene' malite Guvelesi ve alosa lo huko line' gamazi do gihile izelingumu' nene zou zou gohi lave li gilaa' nani' nene ladani igi gilikeve. Aza nene zou zou lamive. Asi evene' hamokisi vi tolovo ilizave lo gelamo mukito' nene lu'ine di

velepe' izilizahoo lo lengikumu' nene goseleka lamo ha gizebo o neive.

¹⁰ Ne'mine ogo neiha guminelo' ve alisave lo gelamune' gamenelo' igi hetelaa' nani' ne'mino a'mine Guvelesi ve aline' gamene've nene soto' oloseive. A'mine gameneu' Okulumo' neve nene gugu lo vo haha oloseive. Ido' a'mingu' inite' mata' muki' nene ololi'movo' lovo' lovotevo' o-ngidivo haza nite' gidilisave. Ido' misubo nesi ido' a'mingu' di soto' naani' inite' muki' nesi nene ololi'mo ningeleseive.

¹¹⁻¹² Ne'mino ololi'mo inite' mata' muki' nene ninge osu' lavo apile osu' lilido' o neine' nenaze. A'mine O'moso'mi gamene nabamu' gizebo igi minilizangu' nene a'mine gamene nene geto ogo hetelelingumu' ve li O'moso'mi evenele gehpeve mini monoku' monovo laminetokovo' e'meti minilizado' o neive. Ado' a'mine Okulumo' nene ololi'mo lovo apilevo' neivo a'mingu' mini'mi monani' inite' mata' nene lala lilizani' gamenemu' nene noluve.

¹³ Ido' ne'mino lo osu' loloseine'za aza lo huko lo-lidine' gamazi do gihile izo monovo lisihe' laminekovo' mineline' Okulumo' atoli'mine gosohokisi misubo atoli'mine gosohokisi do soto' o-ledeleseive lo a'minemu' gilingili ogo gizebo ogo none.

¹⁴ Nemu' nene lu'ne lengeme nouvoni' alevek-izo, a'mine initekumu' gilingili igi gizebo igi minilizangu' nene Guvelesi ve ogo ningeline' nene laza luteu' goloso monovo nomivo ido' okodelo' gamazi nomivo mino hongu lo nonivo ningelive li a'midokovo' amuzo mili minilo.

¹⁵ Ido' Guvelesi ve aza geto amo gizebo ha ogo

neingumu' gililizani' nene aza evene' gohi ma do lu' izelingumu' nene ne'mine ogo neive lisa nene gili minilo. Leze zuho lute eme nonive Paulo'ni O'moso'mo gele nge lo minaa' monovo lehizedido' do molo azasi nene a'mine mene luvoni' gamazi ne'minesi nene mo luhuvo gize-lingidine' ma neive.

¹⁶ Ido' luhuvo nite' muki' ei' gizingu' nene a'mine ne'mine initekumu' gizidaa gizida nene a'mine hamoli'mine gamazi memu' nene mo azasi hamo' gamazivo' gize'mo vo neive. Ido' a'mine luhuvo nite' gize'mo vingu' nene gamazi linge ma monovo've geto gele lamine' amolonido' o minine' gamazi nesi nene gize neive. Ne'mino neine' nenako mono' monovo gili vevesami lu'ine amuzo molamive ingine mono' godolou' gamazi linge'mi monovo nesi nene di zovo' zava' iza' naadi'mine igi a'mine Paulo' gamazi've nesi nene a'mine'mine igi di zovo' zava' iza' nave. Ne'mine iga' naadoti' nene angise'ine meni'ine goloso nene di soto' iga' nave.

¹⁷ Nemu' nene lu'ne lengeme nouvoni' zuhokizo, lingine a'mine ne'mine ilizangumu' nene mo gili nizani' ma neize. Lingine monoku' lamine' mine ngi li nizanguti' nene mono'ine nomivete di zovo' zava' iza' naani' monovo'ine ne'mo nene gelelehe' o-lengedavo limi ingikelizaze. Ehe' igi ningisa minilo.

¹⁸ Ne'mine igi mini Guvetesi ve do lu' iza' ive Izesu' Kilisito' ninge lamine' oga' neine' monovo' e'metaa' naani' nene gohi di naba i'mi vi mini eze monovo danava've nesi nene gili ngolo' li'mi vi minilo. Eita guvele soto' oga'

neine' monovo've nene minevo minevo' ogo idis-
esi alingetasi mine do vo minilihoo. Mo ne'mino
minelive.

Moda a'nesi' ve.

MONO' GODOLO GOSOHO'
The New Testament in the Dano (Upper Asaro)
language of Papua New Guinea
Nupela Testamen long tokples Dano (Upper Asaro)
long Niugini

copyright © 1989 Wycliffe Bible Translators, Inc.

Language: Dano

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

PDF generated using Haiola and XeLaTeX on 18 Apr 2025 from source files dated 31 Aug 2023

76c78bc1-63e6-5f61-a363-169051cfe72e